

Körnlibank 2020



Körnlibank 2020

Körnlibank
Sumpfhuhn



Top Aktuell oder Abhör-Affäre auch bei den Obervögeln

I ha hüt ghört von da weltwita Crypto-Spionage-Affära
döt hät sich a Schweizer Firma und da Bundesrot mösa erklära.
Und mer Obervögel sind in däm Fall au a chli involviert
dänn da Geheimdienst hät au üs bim Wahlverfahra abghört und usspioniert.
Doch zum Glück hönd üs dia Spitzel nöd rächt verstanda noch fuf Fläscha Sunnabräu
Und jetzt meinids, da Björn Graf seg da neu Kriessner-Oberleu.

Danke an alle Frauen, Mütter und Sonstiges

Hönd ihrs scho gmerkt, liebi Lüt?
Alli Fraua fiirid da Valentinstag hüt.
Drum hönd mer üs ganz speziell gschminkt
hönd duschat, sind parfümiert, dass es i da Beiza nöd so stinkt.
Mer tönd drum hüt au extra as wiiblich Gschlecht dänka
und hönd eigentli allna Fraua wella a Rosa verschenka.
Doch isch üs dä Rosa-Kauf ganz bös abverheit'
und mer Henna hönd drum gest grad no a paar Eier gleit.
Und sötts Gender im Saal ha, also Ma und Frau
dänn prüeft da üsi Reini denn scho no ganz genau.
I däm Sinn dankid mer allna Fraua und Mütter
föri euri gross Arbeit vorallem bim Kinder- und Manna-Fütteru.

Freiwilligenarbeit einer Rentnerin



Es schneit und schneit und schneit
 drum hät d Bea Niederer Händscha und Kappa agleit.
 Dänn ihres Auto häts zuadeckt mit ganz viel Schnee
 und sie schufat wia wild, han i gseh.

Doch wo dia anstrengend Arbeit isch vorbi
 merkt sie erst, dass es gär nöd ihras Auto isch gsi.

Roger Keel's Kebab-Bestellung

Hüsli-Baua git för alli grossa Hunger und Durst
 und am Roger Keel sini Helfer wänd nöd immer nu Brot und Wurst.
 Drum bstellt er telefonisch a paar Kebab z Altstätte oba, wieso au immer
 und goht a chli später gos hola und dia Gschicht wörd schlimmer
 dänn im Altstätter-Kebab-Schuppa weiss niemert vu dära Bstellig
 da Roger fluachat und wörd sogar a chli negativ uffällig.
 Bis er luagat ungläubig uf sis Händy und kommt nümme druss
 dänn dä Tubel hät da Kebab bestellt z Näfels im Kanton Glarus.

Strategie der Ortsgemeinde



Au dia vo de Ortsgmaind wänd da Räßstock nöd misse,
 und händ ihn sich grad unter da Nagel grisse.
 Villicht stoht dahinter e gheimi Strategie
 und s Dorfzentrum erwacht bald us sinare Letargie.
 Wenn's bim Pizzalieferservice au no wörid mitmache,
 gäb's im Dorf sicher wieder einiges zum Lache.

Wenn d Ortsgmeind de Sterna, s Kreuz oder d Trauba au no wörid überneh,
 gäb's a da Fasnacht dänn würlklich no rabeschwarza Schnee.
 Und was würid dänn eigentli mit em Ochse passiere?
 Dänk nünt, sie wörid au im Rotlicht ihras Geld ikassiere.

Fürst-Weine sind top

Mängmol isch s'Läba scho a chli fies
 Vor allem bi da Tombola-Priis
 Und as isch a da Turnerunterhaltig scho a chli gspunna
 do hät da Lukas Fürst doch grad sin gspendata Wein selber gwunna.

Gastgeberin mit schlechten Augen



D Anni Haldner, Elmatweg hät Gäscht im Hus.
 sie offeriert ihne an Apéro, dia Frau kunnt halt drus.
 Sie holt a tüüri Fläscha us ihrem Keller
 doch d Gäscht vertrüled bim Suffa d Auga immer schneller
 und scho bald sind alli schnell zum Hüsli gloffa
 will d Gäscht statt Wisswii, Wii-Essig hönd gsoffa.

Ein Festbruder am Zapfhahn

Bi da Neuuniformierig vom MVR ha is gseh
 Wie schnell s Level vo da Musikante noch am Feste tuet abneh'
 Do hockat nämlich an junga Ma am Bierusschank
 und schloft am Nachmittag dabi tüf und fest uf am Bank.
 Luca Schönauer: Du junga, pflichtbewussta Trompeta-Maa
 isch wohl an Traum, wänn ma nebed ama Bierfass au no schnarchla cha.

Bus- und Bahnfahrt mit Apollo



Da Ernst Gruber muas geschäftlich uf Winterthur
doch da isch för ihn a Reise-Erlebnis pur.
Dänn er fährt mit an Trolley-Bus und da Bahn
da wär grundsätzlich gsi am AXA-Maa sin Plan.
Doch z Heerbrugg trinkt er no an Kafi und verpasst da Zug uf St. Galla
fährt drum mit am Taxi und muas mit sim Geldseckel pralla.
Und bim Rückweg ärgerat er sich nomoll grüe und blau
will är z Heerbrugg in Bus isteigt Richtig Lustenau.
Und endlich z Räbschta wieder acho, betet er: „Herr, i bi dumm
aber komisch isch: I weiss nöd warum“.

Nächtliches Treiben im Hause Keel

De Guido Keel, ex FC-Tschutter liet i de Stube am Pfuse
und am Drü i da Nacht verschreckt er uf vo me Grüschi und luegt veruse.
Er meint, an libreicher sei dusse a de frische Luft
springt uf und schreit use: „Verschwind du Schuft“
Doch dusse isch kein libreicher sondern a ganz wilds Füdla
dänn sini Frau Yvonne isch am Morge am Drü ufem Sitzplatz am Bügla.

Ich kaufe in Rebstein und du



Wänn man is Usland goht go Posta,
dörfs mägmol au öppis kosta.
Mit em Ikaufswage lässig durch Regal rolla,
isch jo logisch füllt ma ihn randvolla.

Bim Fleisch do isch es denn a da Grenze au passiert,
bim Heini Steiner hät de Zöllner reklamiert.
Nei es goht nöd um Rinderwahn oder BSE,
Heini: Du söttsch doch langsam wüsse, wüüvill dörfsch über d Grenze neh'.
Mer könd über diä gross Geldstrof eigentli nu rohta,
aber as isch viel Geld gsi für a Kotelett, zwo Blätzli und da Brohta.

Sportlicher Musikverein Rebstein



Üsi Musikanta machid am Sponsorlauf an Marathon, also 42 Kilometer mit Trompeta, Trommla, Bass und au am Bascheler Peter.

Zu dera sportliche Leistig tönd wir eu gratuliera
aber au no a bitzeli spitz bilanziera.

Hättet sich nämli üsi Tschutter au so wie ihr is Züg ini gleit
wärids im Summer vielleicht nöd i dritt Liga abi gheit.

Verletzter Räbschter Fasnächtler im Fernsehen

A da Tätschernacht isch s Fernseh z Räbschta gsi
und hät d Arbet vu da Samariter unter d Lupa gno, a kli

Do isch plötzlich an Maa ini torklat is Notfallzimmer
und zeigt im Fernseh sin blut-überströmt kaputti Finger.

Sis Gsicht isch verpixlat, d Stimm verzerrt, also unkenntlich gmacht,
und alli frögid sich: „Wär isch dä lustig Maa i da Fasnachts-Tracht?“

! ha guat gluagad und ha vor da Glotza eimoll nöd pennt
und ha da Fabio Litscher grad a da dreckiga Fingernägel kennt.

War es nun Rind- oder Schweinefleisch?



D Behörde vu da Ortsgmeind isch wieder bi da Pensionierte gsi
und hönd wie all Johr Wii und a speziells Gschenkli dabi.

Das Johr spendierids a Rindsmöckli, d Betonig uf Rind.

Doch wo i d Etiketta mit da Zuatata lies dahom no gschwind,
do gseh i, dass s Rindfleisch deklariert isch als Fleisch von da Saua.
doch zum Glück bin i tolerant bi Schriebfehler, liebi Fleisch-Egga-Fraua.

In der Nacht sind alle Katzen schwarz

Es isch wiedermol so wiit,
es isch für d Gaby und de Urs Hartert Ferie-Ziit,
Z Seefeld im Tirol sinds gsi ganz allei
ohni Kind und ohni Katz dia Zwei.

Am Dorffäscht am Obig händ sie sich verwöhne lo'
und tönd au a bizzli über d Sträng schloo.


Vor am Hotel wieder zrugg am Morge am zwei,
mit am Hotelschlüssel dänkt de Urs händ mer das gleii.

Noch es paar Mol ausprobiera, es will eifach nöd funktioniera.

«Mönd mer jetzt wirklich no alüütä, dass üs öpert tuet höra??»

Es kunnt en Mitarbeiter im Pisch z Hilf und seit: «Hönd ihr Zwei dänn nöd gseh'
ab Mitternacht mönd er s Obedschloss links nebed da Türa neh'.

Wohin mit der 5G-Antenne?



Dia planti 5G-Antenne im Ergetaquartier ischt in aller Munde
D Initianta und mer Obervögel sind drum zäma im Bunde
D Antenna baid mir morn morga uf üsa Rothus-Tempel
und statuierid mit däm a innovativs Exempel.

Mit däm neua Antenna-Standort tönd mer Räbschter dänn prahla
und üsa Rotsschreiber Urs Graber ka endlich au wieder amol strahla.

Scherben bringen nicht immer Glück

Da Hampi Graf, dä vurn Hampis Express
isch wia alli Pensionierte immer im Stress
Er goht i d Sunnebräu go a Bstellig ufgeh'
Und hät sich nöd wia normal könnä beneh'
Er redat mit Händ und Füess und tuat da Verkäuferinna sis Leid klaga
Dabi hätt er doch grad zwo Geschenkspakiga vom Tresa abi gschlaga
und dia Kartön und Bierfläscha sind verfloga i tuusig Stück
Jo, lieba Hampi: Au dir bringid Scherbe nöd immer nu Glück

Durstiger Otto der Erste

A da letschta Fasnacht chunnt de Otto Graf in Horscht
und hät am Samstag Morge mächtig Dorscht.

Alli händ es Bier, drum will er au eis.
Er suecht lang, aber findet keis.

Niene gseht er a Sunnebräu Fläschli,
aber uf em Tisch stoht scho a 5-Liter-Fässli.
Wo er wett es Bier useloh, de armi Tropf,
suecht er verzweiflet noch em rote Knopf.
Liebe Otto, bim Fässli isch es wie bim Maa,
es hät immer una en Zapfhahn draa.

Frau Messmers digitale Welt

D Bettina Bürgin liest Nochrichta nach am Zmittag-Essa
Und wa jetzt kunnt, han i nümma könna vergessa.
Sie probiert, da Text mit zwei Finger z vergrössera - as vertätscht mi schier.
Sie merkt nöd, dass d Zitig nöd uf am Handy isch, sondern us Papier.

Kirchglockengeläut nur für uns Frauen



Im letschtaJohr isch da grossi Frauenstreik-Tag gsi
und da Renato Tolfo sympatisiert und isch mit Liib und Seel dabi
Üsa Pfarrer hät för alli Wiber drum d Kirchaglocka extra lüüta loo
„Da Renato heg halt scho a chli weiblich Züg“, han i spöter vu nara Kirchgängerin vernoo.

Rentner im Stress

Da Fasi und d Esther Langenegger sind sportlichi Lüt
doch im Riet ussa han i öpis komisches gseh hüt.
Sie stossid ihras E-Bike und hönd an rota Kopf ka
will ma bi däna Velo halt d Batterie scho no sött dabei ha.

Da mögen sich zwei Männer nicht



Da Peter Lüschi motzt am Infoobed luutstark über d Arbet vum Gmeindrot
er isch uzfrieda mit Baustella und Strassa-Beleuchtiga am Abend spot.
Do verklepfts da Ivo Keel und er seit unverblümt vor allna Lüt:
«Lüschi wandera doch uf China us, am liebsta no hüt!»
Und für mi isch dä Fall eigentlich sunnaklar
i zahl da Chinesa d Ablösesumma grad hüt no i bar.

Burgtätscher am Grill

Vier Kerli vu üsära Burgtätscher Guggamusig
isch as im Sommer ohni Geklimper wohl langwilig.
Dia gstandna Manna sind vielsitig und sehr schlau
und grillierid a da Schweizer-Meisterschafta z Aarau.
Und wa niemert globt: Dia Helda wörid Vizemeister, also Zweita
nu da Grupp-Name „Mund-Orgasmus Rheintal“ tuat mi sicher no is Grab begleita

Spüre ich da ein bisschen Neid?



Kindergarta, Schuel, Kirchgemeindhus, FC-Hütta und au no d Halla för d Unihockeyaner
all dia neua Bauta z Räbschta projiziert und begleitet da Otto-Peter Graf als Planer
Und i bi all davo usganga, dass da Eggenberger eigentli üsa Dorfkönig ischt
doch neu brilliert da Otto-Peter nöd nu im Musikverein als Solischt

Frauen und Autofahren

D Meni, Verkäuferin vum Lingeag, dia Beschti im Bäckerfach
parkt s Gschäftsauto i ihre Garage trotz hohem Autodach.
De Garagegriff steckt döt so fescht, kas da überhaupt geh?
dass man im Innere vom Auto sogar da Garage-Griff ka gseh.

Vergesslichkeit einer jungen Mutter




Bussa gits för z schnell fahra, falsch parkiera oder bsoffa an Unfall baua
doch d Kathrin Schmitter-Galli-Keel kund eini über fürs Klaua.
D Tankstell z Lüchiga hät ihra nämlich a Rechnig gschickt,
dänn Benzin usa loo ohne z Zahla isch kei Kavaliersdelikt.
Usa cho isch dia Gschicht übrigens dank am Videobewiis
Käthi merk dir: „Au Henna sind Menscha und kei Geniis“.

Vorschneller Turner

Am Turner Philipp Büchel sini Kreditkarte läuft bald ab
drum bstellt er a Neui bevor die Alt macht schlapp.
Kum überko verschniedet er d Karte ohni Scheu
Da wär alles richtig: Nur dummerwis isch as dia Neu.

Tschau Ramona



Mer Obervögel sind truurig wägam Wegzug vu üsara Ramona
 Sie verloht d Kircha und tuat üs mit dära Nochrict nöd verschona
 Weg vo Räbschta goht sie, i dia grossi grossi Stadt
 und macht üs Obervögel grad a chli truurig und schachmatt.

För üsas Dorf häscht du enorm viel gmacht
 und häsch mit üs i da Fasnachtskircha vielmol glacht.
 Dini Vers sind phänomenal und tüfgründig gsi
 und mir hoffid, dass dä luschtig Alass nöd för immer isch vorbi.

Ramona: Mer Obervögel dankid dir för dia schöni Zit
 Und sägid eifach: Du bisch und bliebsch da Hit.
 In a paar Mönat gohts z End, dis Räbschter Kapitel;
 drum hönd mer dir a da Fasachtskircha bereits vergäh, da passivi Obervogel-Titel.

Sandhaufen sind höchst gefährlich



Da Peter Lüschi isch nach am Gmeinds-Infoabend hom gloffa und isch bi da Weed-Baustell grad imana Sandhufa versoffa.

Er ka sich zum Glück no befreia mit Müha und Not
Lüschi: Setz es bi da Gmeind' endlich dori, dis Sandhufa-Verbot.

Und d Obervögel tönd drum för üsi Mitbürger au no mitdänka und wörid ihm am Umzug präventiv no a Sandschüfeli schenka.

Krank sein ist lästig

Seit hüt morga bin i müed, ha Kopfweh und as isch mir schlecht,
i lieg im Bett, ka nöd go schaffa, min Maga tuat nöd so recht.
I ha mi agsteckt mit ama Erreger, drum bet' i scho zum Antonius
Aber i ha Glück gha, as isch da Sunnebräu- und nöd da Corona-Virus.

Gemeindepräsidenten on Tour

D Oberrhinter Gemeindepräsidenten tönd us em Winterschlof verwacha und möchtid a Schuelreisli zum Bundesrot uf Bern ufl macha.

Am Morga ka mer drum üsa Räbschter Gmeindspräsi, da Andi E überall am Schnorra und Netzwerke geseh.


Scho uf am Bahnhof, do as Schwätzli und Hoi wia gohts?

Da Zug fahrt ab, för da Andi ischas zum Istiege z spot.

Mit grossa Verspötig sind dia Präsidenta dänn endlich z Bern ako

Aber wo isch dänn da Eggenberger, wo?
D Session im Bundeshus isch scho lang gstartet
und dia 4 Oberrhintaler immer no uf s Räbschter Gspänli warted.
Und zwo Stund spöter ist au da Handörgeli-Andi endlich do
will är vo Olta bis uf Bern us Verseh' da Bummelzug hät gno.
Und über da witer Verlauf vu dära Reis tue i besser schwiega
über da ka dänn spöter da Lüschi an Zitigsartikel drüber schriebe.
Dia Gemeindspräsis hönd no viel me agstellt, as isch ganz verruckt;
drum isch dia ganzi Gschicht au no i da offiziella Fasnachtszitig abdruckt.

Und tschüss



Söttid Lüt mit üsara Versli Problem ha, goht üs da am Arsch vorbi
mir hoffid eifach, ihr seid morn am Umzug au wieder dabi.
I däm Sinn wünschid mir eu witerhin a schöni Fasnacht
und fäschtid bi üs z Räbschta witer, am liebsta dia ganzi Nacht.

Körnlibank

Zapfhahn



Marper-Bauer auf Abwegen



Da FC Rebstein will sini Tschutt-Anlage usbaua
doch an Marper tuat mit sinera lisprach' das Bauvorhabe versaua.
Wieder so an komische Marper, tua i laut dänka
wäg dänä hönd mer doch scho mösa üsi Fusions-Milliona verschänka.
Und dä Marper-Grindli hät sogar scho mis Ess-Verhalta verändert, o weh
ab sofort fress i nu no Wurstsalat statt Chicoree.

Unnötige Arbeiten eines Tschutters

De Martin Eggenberger, Huusmaa und Tschutter-Trainer vom Eis
schleppt vier Winterpneu vom Keller ufe mit grossem Schweiss
Doch alli lached: Het da Eggi öpe en Suff?
dänn sini Winterpneu sind jo scho s ganz Johr uf em Auto druff.

Neuer Inselstaat



„Räbschta isch neu an Inselstaat“, säg i zu minara Frau, da Lisa
und sie hönd mi drum grad sofort i d Klappsi uf Pfäffers überwiesä.

Dabi stimmt dia Aussage zu 100%, i ha doch nöd gspunna:
Ei Insla i da Betta, eini bim Migröli, eini bi da Sonnebräu und eini im Steinacker una.

Rebstock wird verjüngt

Was hät man do gross i de Ziitig dörfe lese und gseh',
mit am Räbstock gohts zum Glück a de Fasnacht wiiter, juhee.
Dia Junge vo dä Zita und em Göggel schmeissend hür de Lade,
aber d Zita zücht im Hintergrund sicher no vielmol da Fade.

Isch üsi Zita wirklich scho fasnachtspensioniert?
Suecht man ab am Summer wirklich en neua Wirt?
Oder mached dia Jungä noch de Fasnacht grad au witer im Stock?
uf da hättid vieli Räbschter am meista Bock.

Und mir Obervögel haltid Ohra offa für eu dia ganzi Nacht,
und dankid em Rebstock-Nochwuchs für ihri Arbet a da Fasnacht.

Wo ist Walter?



S Damen-Einzel vom Tennisclub isch i feschter Hand,
gege d Fraue vo da Famili Grob spielsch ana Wand.
Im Halbfinal stönd alli drüü, jung wie alt,
im Final macht d Ursi d'Jasmin kalt.
Au im Mixed und im Doppel tuet's aso ende,
mit em Sieg vo allna Grobs üserne Tennislegende.

Du ggesch: Sport isch gsund i jedem Alter
aber wo isch eigentli da Vater, da Walter?
Und es isch klar und wörd niemert erstune
dä hanged statt am Tennisball a sinara Posune.

Abfall und Wohnwagen wo man hinsieht

Z Räbschta hönd mer Problem mit am Abfall uf da Strossa und Trottoir
Do mönd au mir üs ändera, da schient allna sunnaklar.

Und d Verteilata vu da Wohnwäga vum Zelt-Dietsche isch au nöd besser
dia Wildparkiereta überall im Dorf würed vu Johr zu Johr au immer kesser.
A da Ergetastross, bimTschuttplatz, bim SFS - überall stönd sini Wohnmobil

Mäk: Da goht unter Abfallentsorgig und zügt nöd grad vu grossem Stil.
Wo i kürzlich durchs Dorf spaziert bi, han i fascht d Krisa übercho
will i gmeint ha, mir hegid vu Thal da Platz för dia Fahrende scho überno'.

Lärmiges Rebstein



I da Zitig stoht: Z Widnau muas an Güggel weg, as isch zum Lacha
er kreiht am Morga und tuat drum z viel Lärm für d Nachbura macha
und i ha a chli Angst und tua scho heimlich umma gaffa
öb ma d Regula Büchel au wäga Lärmbelästigung könnti usschaffa.

Marcos Suche nach seinem Auto

Er suachts dahom, und uf am Tschuttplatz isch es nöd
da Marco Keel suacht verzweiflat sis Auto wia blöd
är suachts vor allna Beiza und sogar z Altstätte oba
dämm häts wohl öpis im Hirni verschoba.

Da Marco kunnt nümme so druss
Dänn die Promille mached ihm Verdruss
Vorbildlich er z Fuass hom goht.
Und nöd merkt, dass sis Auto scho sit am Mittag bi Mama und Papa stoht.

Wir haben eine Vision fürs Geserhus



Z Räbstä sind no mängi Bauprojekt offa,
es sind au no nöd ganz alli beschlossa.
Ei Projekt isch fertig und ab sofort lauft's rund
bi da Turner im «Hüttli» bi üs uf am Grund.
Wiiteri Projekt sind s neu Geserhus, a grossi Unihockey-Halla,
und am neue Tschuttplatz findet mör erst ab 2025 Gfalle.

Doch wenn ma doch wür dia Bau-Projekt alli zämme neh,
dänn hättid mir an Vorschlag wia z Basel bim FCB.
Döt ka ma bim Altersheim us em Zimmer direkt uf da Tschuttplatz gseh'
und mir Obervögel hönd a Vision för öppis ähnlichs oder no meh'.

Mir schlagid vor, a Aussichtsplattform im Geserhus mit Fernrohr ufs Dach ufi zmacha.
nei das isch för d Geserhus-Planer sicher nöd zum Lacha,
denn könnid d Pensionära über dia neu Flutlichtalag vom FC
grad bi da Gators i dia neu Hockey-Halla ini gseh'.

Ein ganz schlauer Mann



De Mäse Bürgin will vor em Huus en neue Sitzplatz baue,
 und dänkt, er seg ganz an Schlaue.
 Zwo Kubikmeter Split sind furchtbar schwär,
 drum füehrt er dia mit em Rapid dahär.
 Schnell isch die Ladig abglade gsi,
 doch die guet Stimmig isch schnell verbi.
De Split dä brucht er nämli gär nöd!
 Wie ka ma nur si so blöd!
 Sini Kind dänkid: Isch üsa Papa no bi Verstand,
 wos ihm gholfe hönd uflade, damol alles vo Hand!

Kurzfassung eines Missgeschicks

Martha Gruber i da Autowöschstross - dia Gschicht isch krass
 Martha fährt ini - Auto kunnt usi - d Martha isch ganz blass
Autofenster isch offe, Sitz isch nass - d Martha hätt kei Spass
 D Martha fährt hei - ihras Füdli isch dabi pflutsch-nass.

Unsere Gebete wurden erhört



S letscht Johr hönd mer eu verzellt
dass man üs z Räbschta alles steht.

Zum Bispiel d Katza im Oberfeld und d Fussgängerstreifa
und hüt könnid mer üsa Stolz nümma verkneifa.

Dank üsam Getöse hönd mer wohl da Herrgott a chli gstört
und dä hät drum alli Wünsch vu üsam Pfarrer sofort erhört.

D Katza sind noch am Keudera schnell wieder hom cho
und da Kanton hät wäg üsara Spruch über d Fussgängerstreifa schnell da Mut verlo.

Doch mer sind glich no a bitzeli traurig und wänd drum kein Applaus
mer suachid und suachid immer no s Leiterwägeli vom Samiklaus.

Morschers Ferienerlebnis

Da Dani und Maya Morscher sind i da Ferie z Afrika gsi
und im Arragement isch auch an Ausflug i d Wüsti dabi.

In aller Hergottsfrühe gohts för dia Beida usam Näscht
und sie wartid vor am Hotel uf dia andera Ausflugs-Gäsch.

Dia Beida wartid und wartid gschlagni zwo Stund'
do goht da Dani zur Rezeption und tut sis Problem kund.
„Uf mim Zettel steht Abfahrtszit acht-Uhr-fünfzehn“, seit er voll Kummer
do lächlat s Fräulein: 815 ischt ihri Zimmer Nummer

Holzschnitzer auf Abwegen



I gseh da Roger Keel uf da Rückkehr vu da Holzmess'
i da Nacht am Vieri und er ischt mächtig im Stress.
Verlora hät er nämli all sini Arbeitskollega vu da Schreinerei
Er irrt im Bahnhof Züri ume ohne Zug und ganz allei.
Au sin Handy-Akku isch leer
doch zum Glück kunnt grad a Taxi daher.

Am andera Tag hönds uf ihn gewartet uf am Bau
nöd nu sini Arbeitskollega sondern au d Martina, sini Frau
Zum Glück isch er wieder uftaucht, aber ohni Geld
üsa Obervogel, Holzwurm und Maa vo Welt.

Missglückter Fernsehauftritt

Da Werner Zünd diskutiert mit da SVP-lera Jasi Hutter
im Fernseh TVO und as schient eigentli alles in Butter.
Doch är redat so an Scheiss zäma, isch halt doch kein Philosoph.
Schile: Gang nüma zum Fernseh, fütterta lieber d Tierli bi da Jasi im Gnadahof.

Ein Pensionär in Nöten

Da Peter Hengi hät am Pokalturnier vom FC
wäg da grossa Hitz viel Durscht ka - han i gseh.
Heiliga bimmbamm, dä hät am Obad för fuf gsoffa
und isch i da Nacht trotzdem nu z Zweita hei gloffa.
Doch acho isch er bi sinara Reini, üsa Trinker-Held
mit Verspötig, verschlagnam Grind und ohni Geld.

Schürfiga verheilt, d Nasa isch wieder grad, s Schlimmste isch vorbi
und da nu will s Trottoir zwei Zentimeter z hoch isch gsi.
I ha sogar ghört: Er seg ufara Eisblottera usgrutscht, au verdammt
und er verklag' wäg fehlendem Salza im Summer grad no üsas Bauamt.

Sonnenbräu wir lieben dich



Amana Zistig-Obad luag i nu ganz kurz
im Fernseh no da Kassensturz.
Do testids verschieden Bier us da ganza Schwiz
und sägid: S Sonnabräu isch fad und gschmackslos - för mi an Witz.
Üsers Sonnebräu wörd drum zweitletscht i da Ranglista
und i wett aber uf das falschi Resultat grad no a Kista,
dass alkoholfreis Bier doch niemert sufft, also tuat dä Test nünd nütza.

oder ischt d Jury vielleicht bestocha wora vu da Schütza-Pfütza?

Und am nöchsta Tag lies i i da Zitig, i ha fascht gspunna
do hät s Dunkel- und s Lager-Bier grad je a Goldmedailla gwunna.
Und so denk i halt: Üsars Sonnebräu isch för mi eifach s Best
ob mit oder ohni Alkohol und Kassasturz-Test.

Neuer Räbschter TV-Star ist geboren

Amana Suntigobad vor am Fernseh, mit ama feina Alpenbitter
luag i d Sendig „Menscha i da Ostschwiz“ mit üsara Marlis Ritter.

Üsa neu TV-Star isch i da ersta Sendig bi da Tschutter im lissatz
und wia i gseh: Dia Massnahm' isch sicherlich nöd för d Katz'.
Dänn da Apollo grölat mit anara rota Bira i d Kamera- wie da höchsti Soldat
doch zum Glück stoht d Marlis för sini Sicherheit scho mit am Defi parat.

Unvorsichtiger Tschutter

Da Sandro Steiner goht i da Ferie go bade
und im Tessin una entsohnt ihm an grossa Schade
Es lüüetet nämli niemert me a, das isch an riese-grosse Kack
will er das huere Natel vergässa hät im Badhosa-Sack.

Auch Chefs haben Durst

Da Nöba Schönauer will a d Hauptversammlig vom SAC
da Tagigsort Roslenalp isch hoch im Berg oba, han i gseh'
Und bim Ufstieg hätt er grossi Problem, er mag nümme ufi i dia Hütta
weil er am Vorabend amana Fest zviel tuat in sis Hirni ini schütta.
Im Tal wieder ako, muess er zerst im Auto no zwo Stund go schlafa
sonst mues ihn d Polizei scho am Nochmittag wega Restalkohol strofa.

Betretungsverbot im Töbeli



I lese d Zitig am Morga - gmütlich bi mim Tee
und ha a komisches Inserat vom Johann Gruber geseh'.
Er schriibt: As gebi ab sofort im Töbeli a Betretigsverbot,
dia Massnahme seg nötig, will Gmeind bring ihn i grossi Not.
Da Verbot gilti übrigens nu fôr da Gmeindspräsident und da Rot
und sei gültig vom Morga früh bis am Abend spot

Und i ha träumt: I seg mit da Gmeindrötin Böhler im Töbeli - as isch kum zum globa
I und mini Monika am heimlich Küssa uf am Bänkli im Hirschala oba.
Do kunnt plötzlich da Gruber us am Wald - ganz unverdrossa
und hät üs Zwo doch grad verschossa.

Auch wir können Fake-News



D Klimaaktivistin Greta Thunberg isch z Davos am WEF gsi
und uf am Rückweg konnt sie bi üs z Räbschta vorbi.

Uf am Rhintaler-Höhenweg macht sie im Tobel oba a Pause zum Trinka
trifft da Jürg Litscher und seit: Din neua Geländewaga tuat aber au no grössig stinka
Wa sufft dänn das gross Vehikel für spezielle Most?
Do sagt da Jürg furztrocka „Dänk dä vom Kobelt Prost“.

Und i da Hub una seit d Greta, sie teg da FC-Präsi guat kenna
seg aber froh, dass er no kei Schneekanona kauft heg fürs Fassdaubenrenna.
Und nochher frögt sie d Hub-Mägi nach ihrem ökologisches Fussabdruck
„I ha s Nünadreissgi“ sagt sie spontan und nimmt grad no an Schluck.

Dänn lauft d Greta da Berg abi, zum Dorfplatz, grad vor d Drogerie
und sagt: „Hät da Rebstock hüt offa? I muess no zu da Zita, zu da neua Veganeri“
Und bim Lombardi kauft sie no s Obervogelbrot und hät glacht
als Barbara sagt: „Da isch übrigens ohni CO₂-Schadstoff gmacht“.

Da letzte Halt macht d Greta im Haarfresser Peter Sieber sim Lada
und sagt: „Herr Busch, häsch du eigentli an Schada?“

All dini chemische Haarmitteli kasch grad im Kübel entsorga
sonst demonstrier i vor am Lada bis morn Morga.“

Do seit da Peter zu da Greta locker und ganz cool

„Säg amol, söttist du eigentli nöd wieder amol i d Schul?“

I meld di grad bim Schönauer a für da Schulbsuch i da OSREMA
aber eins macht mir Sörga: Sek oder Real wörd bi dir sicher zum Thema“.

Neue Obervogel-Homepage und Tschüss



Au d Obervögel tönd sich entwickla und gönd mit da Zit,
am Busch sin Briefkasta ist Gschicht und üsi Neuerig an Hit.
Mir hönd a ganz neui Homepage im Netz und dia isch genial,
statt uf Fresszettel könnnd ihr jetzt Gschichte schicke, digital.

Bliibid aber scho no a kli hocka und gönd bitte no nöd is Bett
und luagid erst morn uf üsi neu Homepage im Internet.